

I WUJ U TZ'IBAM I SAN PÁBLO CHIQUE I CRISTIAN AJ COLÓSAS

1 ¹Yin in a-Páblo chi quin tz'ibaj i wuj-i, junam ru' i kachalal a-Timotéo. In rapóstol i Jesucrísto man queje ile xraj i Dios chwe. ²Quin tz'ibaj bi chiwe yix chi ix re chic i Dios chila pa tinimit Colósas, yix chi ix kachalal lic ix terejnak chirij i Crísto. I ka Kajaw Dios chu ya ni utzil chomal piwi, xak i uxlambal pi c'ux.

I ma Páblo lic cu tz'onoj che i Dios piquiwi

³Are caka tz'onoj che i Dios piwi yix, nic are wi caka tioxij che ire chi u Kajaw i Kajwal Jesucrísto, ⁴man ka tom rason chi yix lic cul i c'ux che i Jesucrísto, xak lic c'ax que i na conojel ni'pa i qui yom quib che i Dios. ⁵Queje ile quix tijin chu 'anic man cul i c'ux che chi quiwil na wach u c'olom i Dios chiwe chila chicaj. Xi ta usuc' ile wach u c'olom chiwe are xi ta i tzij chi sak laj tzij; i tzij-le are i 'utz laj tzij re i 'elbal chi sak chi u yijbam i Dios chake. ⁶I tzij-le chi bital can chiwe, ca tijin u paxic u wach ronojel u wach i jyub ta'aj; lic je q'ui i winak que tijin chu cojic. Lic je q'ui chic que tijin chu 'onquil i 'utz rumal i tzij-le, xak jun ru' pacha i 'anom li yix are lic xi ta u be i tzij re i c'axnabal u c'ux i Dios. ⁷Are i ma Epáfras xc'utuw ile chiwe, ire chi lic c'ax caka na'o. Lic chacun-nak ku' yoj, xak 'utz u 'anom che u chac i Crísto chixol yix. ⁸Are ire u bim chake wach i nim laj c'axnabal i c'ux chiwach, man 'o i u Tawal i Dios iwu'.

⁹Rumal-i, are xka ta wi li rason, n-ka mayim tu tz'onoxic che i Dios piwi; caka

tz'onoj che, chi cu 'an chiwe lic qui ta ni u be ronojel wach craj ire chiwe, xak cu ya ni i nojbal, xak cu c'ut na chiwe wach cu ch'ob ire. ¹⁰Queje ile caka tz'onoj che, man 'utz qui 'an na che iwib pacha ca majaw chiwe yix chi ix re chic i Kajwal. Queje ile, lic ca quicot ire iwu', wach i qui 'ano. Xak ni'pa tak i chom ca 'anic, yix quix tijin ni chu 'anic, xak quix tijin na chi retamaxic wach u nojbal i Dios.

¹¹I u cho'ab i Dios, lic nim, lic chom. Caka tz'onoj che chi cu cowirsaj na i cho'ab yix ru' u cho'ab ire-le, man qui ch'ij na wach i qui c'ulmaj. N-qui sach ta 'uri u nimal i c'ux chuwach tak ile, xak n-qui sach ti i quicotemal chupam, ¹²xak qui tioxij che i Ta, man ire ix u yijbam chu rikic ni 'utz chi cu ya ire chake yoj chi oj re ire. Cu ya na chake, junam cu' conojel i je re ire chi je 'o pa sak. ¹³I Dios oj resam pu'ab i 'ekumal, y o j u ocsam pa cu 'at wi tzij i u C'ojol chi are i Crísto, chi c'ax cu na'o. ¹⁴Rumal u camic ire, ya tojtajnak chic i kelbal chi sak; xe'elok chi cuytajnak chic ni'pa i ka mac.

Xa rumal i Crísto oj chomtajnak ru' i Dios

¹⁵I Dios, n-'iltal ti u wach, xui-ri, xa 'iltaj che u C'ojol. I u C'ojol-le, 'ax 'o wi chiquiwach conojel, 'atz u 'ij chuwach ronojel ni'pa tak i 'olic, ¹⁶man ru' u 'ab ire, i Dios xu 'an ronojel i 'o chicaj, xak ronojel i 'o chuwach i jyub ta'aj. Ru' u 'ab ire, xu yijba ronojel i cakilo, xak ronojel ni'pa i n-que 'iltaj taj, chi xa je 'o pa tawal, xak ronojel ni'pa tak i 'o piqui'ab i 'atol tzij, xak ni'pa i nimak qui patan;

xak ni'pa tak i je tewalil chi je pacha 'atol tzij, xak ni'pa i nimak qui cho'ab. Ronojel ni'pa i 'olic, are ire 'anawnak; xu 'ano man cu rik u chac che ire. ¹⁷I Crísto, 'ax 'o wi chuwach ronojel ni'pa i 'olic; are ire ca uc'aw ronojel pusuc'. ¹⁸Y n-xui ta la ile, are ire are ka wi ka jolom yoj chi oj jutzobaj re i Dios, y yoj oj pacha u ch'acul. Ire, chi aj yol re u c'aslemal i jutzobaj-le, xak are i nabe chi walijnak chiquixol i camnak. Queje ile 'antal che man que'el na chi ire 'o puwi ronojel ni'pa i 'olic. ¹⁹Queje ile xu 'an i Ta chicaj man xraj ire chi u C'ojol xak jun ru' pacha ire. ²⁰Xak xraj chi u C'ojol-le que u chomarsaj conojel i winak ru' i Ta, xak queje ronojel i 'olic, we aj chicaj, xak we aj chuwach i jyub ta'aj. Are u camic i Crísto chuwach i cruz, are i chomsabal-que xu 'ano.

²¹Xak xix u chomarsaj yix ru'. Yix ujer lic ix aj naj te'ek chuwach i Dios, xak ix aj ch'o'oj te'ek ru' piwanima, rumal i n-'us taj xi 'ano. Xui-ri, wo'or ya ix u chomarsam chic ru' ire, ²²rumal u camic u C'ojol, are xc'un wi chi chuwach i jyub ta'aj. Queje ile xu 'ano, man quix e'el yix lic chom i c'ux, ch'am ix 'olic, lic n-ti mac chiwij are quix u ya i Crísto chuwach i Dios. ²³Queje ile que'el chiwe, xui-ri we n-qui mayij ti u cubibal i c'ux che i Crísto, we lic ix jiquil che, xak we n-ca ba'crij ta i c'ux chi roy'exic i 'utz chi ca pe na piwi pacha i tom lok. I 'utz laj tzij chi i tom lok-le, are i tzij chi wo'or ca tijin u bixquil ronojel u wach i jyub ta'aj; y yin in a-Páblo xak in jun chique i je aj paxsanel-re.

**I ma Páblo ajchac chiquij
i jutzobaj re i Dios**

²⁴Yin wo'or, uyej cu tij in ch'acul, 'anbal 'utz chiwe yix. Xui-ri, quin quicot rumal, man queje ile quin tijin chu to'ic i Crísto ru' wach tak i uyej c'a craj, tobal que i je jutzobaj re i Dios, chi are u ch'acul i Crísto. ²⁵I Dios u 'anom chwe chi in rajchac chiquij i jutzobaj-le, 'anbal 'utz chiwe yix. U yom chinkul, chi quin paxsaj ronojel i u tzij. ²⁶I usuc' i tzij-le,

uwam u wach ujer; queje u 'anom ile u q'ual junab, lic chu xebal lok. Xui-ri, wo'or i Dios u 'alijinsam usuc' chique i je re ire. ²⁷Queje ile u 'anom i Dios man xraj cu 'alijinsaj na wach i nim laj 'utz u ch'obom chiwe yix chi n-ix ta aj Israel winak. I usuc' i xin bij-le are iri: chi i Crísto 'o piwanima yix, rumal 'uri, quiwil ni nim laj chomal chi iwoy'em na.

²⁸Yoj caka paxsaj u tzijol wach cu 'an i Crísto. Que ka pixbaj conojel i winak, xak caka c'ut chique conojel man lic quiqui ta ni u be. Queje ile caka 'ano, 'anbal-re chique chi lic je jiquil piqui c'ux rumal i Jesucrísto. ²⁹Rumal-i, lic quin chacunic, lic quin ya in cho'ab chu 'onquil. Quin chacun ru' ronojel in cho'ab chi yatal chwe rumal i Crísto chu 'onquil in chac.

2 ¹Cwaj yin quiwetamaj na chi lic quin tij in 'ij che in chac, tobal iwe yix, xak tobal que i kachalal chila pa tinimit Laodicéa, xak tobal que ni'pa i kachalal chi c'a maja caquetamaj in wach.

²Queje ile quin 'ano, yabal re u cowil qui c'ux, xak tobal que chi xak jun qui nojbal chiquiwach rumal i c'axnabal qui c'ux. Cwaj yin lic quiqui ta u be wach u ch'obom li Dios chi c'a te u 'alijinsam, man ca cowir na mas u cubibal qui c'ux che. Ile chi u 'alijinsam are i 'elbal chi sak rumal i Crísto. ³Xa rumal i Crísto caka rik i ka no'oj chi lic katzij; xa rumal ire caka ta u be i mer sak laj tzij. ⁴Iri quin bij pan chiwe, man 'utz mi jun quix u t'or ru' chom laj tak tzij. ⁵Yin, naj in 'o wi chiwe, xui-ri in no'oj chila 'o wi iwu'. Quin quicotic man quix tijin chu 'anic pacha i usuc', xak lic jiquil i c'ux che i Crísto.

⁶Yix 'ut, i jachom chic iwib che i Kajwal Jesucrísto; chix 'ol 'uri junam che ire.

⁷Queje pacha jun che' naj 'enak i ra' pa jyub, xak queje chi 'ana yix che i Crísto pi c'ux; chi bisoj u jicbaxic iwib che ire pacha i c'ut-tal chiwe, xak chi c'amwaj chi tioxij che i Dios lic ronojel i c'ux.

**Yoj junam xoj cam ru' i
Crísto, wo'or oj c'as na ru'**

⁸Chi 'ana cwent iwib, mix terej chiquij ique chi cacaj to' quix qui t'or ru' tak i

qui nojim ique, ru' tak i qui c'utunic chi n-tu chac. Wach i quiqui c'ut ique, xa re u wach i jyub ta'aj, to' qui nojim i ujer tak winak, n-petnak ta ru' i Crísto. ⁹Mi ya chique quix qui t'oro, man ronojel ni'pa i 'o che i Dios xak 'o che i Crísto, ¹⁰y yix, xak 'o re i Dios chiwe man ix 'o che i Crísto. Are ire chi 'o piquiwi conojel i je 'o pa tewal chi nim qui cho'ab, xak i nimak qui patan. ¹¹Yix ix 'o chic che i Crísto, rumal-i que'el chiwe pacha 'antal chic i retal circuncision che i aj Israel winak che i ch'acul. Xui-ri, i retal chi 'antal chiwe rumal i Crísto n-che ti ch'acul cojtal wi, are che i nojbal, che i c'ux, cojtal wi. I mal laj tak i nojbal re ujer ya 'elsam chic chiwe rumal i Crísto. Are i retal-le chi u 'anom ire chiwe. ¹²Yix, are xkajsax ya piwi, xe'elok chi junam xix muksax ru' i Crísto, xak junam xix walijisax chic ru' che i c'aslemal c'ac'. Queje ile xe'elok rumal u cubibal i c'ux che u cho'ab i Dios chi xu c'unsaj sak chuwach i Crísto chiquixol i camnak. ¹³Yix, ujer, ix camnak te chuwach i Dios rumal i mac, xak rumal n-ti retal circuncision che i ch'acul, man n-ix ta aj Israel winak. Xui-ri, wo'or 'o chic i c'aslemal junam ru' i Crísto, yatal chiwe rumal i Dios. Ire u cuyum chic ronojel ni'pa i ka mac. ¹⁴Yoj ujer, 'o te i tojbal mac pakawi, man n-xka coj ti 'atbal tzij re i Dios chi tz'ibtalic; xui-ri, i Dios xresaj i ka c'as chikij, lic xu chup u wach, are xcam i Crísto chuwach cruz. ¹⁵Are xu 'an i Crísto ile, xresaj qui cho'ab i je 'o pa tewal chi nimak qui patan, chilam i je pacha rey chi n-que 'alijin taj; xu kajsaj qui 'ij chiquiwach conojel i winak, xe resaj che i qui patan rumal u camic chuwach i cruz.

**Chi tzucuj i 'utz chi 'o chicaj; mi
ch'ob chic i to' re u wach i jyub ta'aj**

¹⁶Rumal ile chi u 'anom i Dios chake, mi coj retalil chique i quiqui tzucuj i mac rumal wach tak i qui tijo, wach tak i qui tu'u. Xak we 'o tak i quix qui ch'ach'a we n-qui coj tu 'ij tak i nima'ij, tak i uxlambal

'ij, tak i rajlajbal ic'; mi ya i xiquin chu tayic ile. ¹⁷Ronojel ile n-ta chic u chac, xa are pacha u ninox jun winak chi coc lok. Wach tak i qui tijo, wach tak i nima'ij qui cojo, xa pacha ninox; jun ninox ca sachic are ca c'un i mer winak. Queje ile xsach i ujer tak costúmbre are xc'un i Crísto.

¹⁸Mi ya i xiquin chique tak i quiqui bij chi xa ix sachnak; mokxa qui sach i sipon cumal, chi nabe chiwach. Ique quiqui 'an pen u 'onquil chi n-quiqui 'an ta nimak che quib; xak lic quiqui coj qui 'ij i ángel. Ique quiqui min quib chu bixquil tak i n-quilom tu wach, xak qui 'anom nim che quib rumal wach tak i qui ch'obom piqui nojbal ique. ¹⁹Queje ile que tijin chu 'anic, man xqui jec' quib ru' i Crísto. Are ire are i ka jolom yoj; rumal ire, ca tijin ka tz'akatic yoj chi oj u ch'acul. Rumal ire xak jun ka wach, pacha craj i Dios; coj e'elok pacha jun ch'aculaj, lic q'uitsam bien, lic u chapom rib ru' u gonsil, xak ru' i riboch'il.

²⁰Yix ya xix cam ru' i Crísto, rumal-i, ni'pa i to' petnak piqui nojbal i winak, n-ta chic re chiwe. ¿Wuchac 'ut, c'a qui ya iwib pu'ab i qui nojbal i to' je re u wach i jyub ta'aj? Yix, ix n-ta chic pu'ab wach tak i quiqui bij ique. ²¹Quiqui bij ique: "Mi yinya ile," xak "Mi tij ile," xak "Mi chap ile ru' i 'ab," que cha. ²²Yix, mi coj retalil che i quiqui bij-le, man to' tzij, xa ru' winak petnak wi i c'utunic-le. I was tak cos-le chi quiqui bij ique, lic n-tu 'ij; we qui tijo, xa ca sachic, n-ta jun c'ax co'on chiwe. ²³Ni'pa i c'utunic chi quiqui bij ique, chom u tayic, péro n-tu chac. Chom quiqui ta i winak are quiqui bij i je t'oronel-le chi 'o u chac caka coj qui 'ij i ángel; xak quiqui bij chi 'o u chac n-caka 'an ta nimak che kib; xak quiqui bij chi 'o u chac caka 'an c'ax che i ka ch'acul. Queje qui c'utunic ile, xui-ri, i qui c'utunic-le n-que u to ti winak chu jeq'uic quib che i mal laj tak qui rayijbal.

3 ¹Yix 'ut, ya ix walijnak chic che i camic junam ru' i Crísto, rumal-i, mi rayij chic i to' re u wach i jyub ta'aj; are chi rayij ni'pa 'o chicaj pa cu 'at wi tzij i Crísto ru' i Dios^a. ²Chi ch'obo i

^a 3.1 I mer tzij xu bij are iri: I Crísto cul pu wikabim i Dios.

'utz chi 'o chicaj, mi ch'ob chic i to' re u wach i jyub ta'aj. ³Man yix ya xix cam junam ru' i Cristo, y wo'or i c'aslemal 'o che ire, xak ire 'o che i Dios. ⁴Che i Cristo 'o wi i c'aslemal yix, rumal-i, are ca c'un tan chic ire, xak queje yix quix c'un junam ru'. Ni'pa i u 'ij u chomal ire, xak 'o chiwe yix are ca c'un chalok.

**Chi canaj can i nojbal re ujer;
are, c'ax chi na iwib chiwach**

⁵Rumal-i, chi chupu pi c'ux ni'pa i n-re ti Dios, ni'pa i xa re u wach i jyub ta'aj; por ejémplo: jun achi mu min rib ru' jun ixok we n-rixokil taj, xak queje jun ixok; xak mi 'an chic i n-ch'am taj; mi ya iwib che i mal laj tak i rayijbal, xak mi rayij u 'onquil i n-'us taj. Mi rayij i n-iwe taj man i mac-le xak jun ru' pacha u cojic u 'ij jun tiox chi xa ril 'antalic. ⁶Mi 'an tak ile, man ca pe i roywal i Dios piquiwi conojel ni'pa i quiqui 'an ile, ni'pa i n-que cojon ta che ire. ⁷Xak yix queje xi 'an li ile ujer, are ix 'o chupam i ujer c'aslemal. ⁸Xui-ri, wo'or chi canaj ni'pa tak i n-'us taj-i: mix oywar chic, mi 'an c'an che iwib, mi ch'ob u 'anic c'ax che jun chic, mix to'tanic, mi ya i chi' chu bixquil i mal laj tak tzij. ⁹Xak mi t'or iwib chiwach, man i canam chic ni'pa i n-'us taj i 'anom ujer; i jalwachim chic i nojbal re ujer. ¹⁰I jalwachim chic che jun c'ac' nojbal. I c'ac' laj i nojbal-le, are i Dios xa 'anawic, xak ca tijin chu yijbaxic pacha u nojbal ire. Queje ile ca tijin chu 'onquil chiwe, man c'raj lic quiwetamaj u nojbal ire. ¹¹Ni'pa i 'o qui nojbal c'ac', n-ta co'ono we je aj Israel, we xi ne te aj Israel; n-ta co'ono we 'o i retal circuncision che qui ch'acul, we xi n-taj; n-ta co'ono we je aj naj, xak we je chicop laj tak winak caka bij yoj; n-ta co'ono we je ajchac piqui'ab i cajaw, we xi n-ta cajaw. (N-ta co'ono xa bi chi winakil.) Conojel je 'o che i Cristo, y Cristo 'o chique conojel; are ile are i 'o u chac.

¹²Yix ix chatal rumal i Dios; u 'anom chiwe lic ix re ire; lic c'ax quix u na'.

Rumal-i, chi ya iwib chi rilic to'bal qui

wach i winak, chi 'ana chi 'utz i c'ux chique, mi 'an nim che iwib, chi 'ana 'al i c'ux che iwib, xak mi sach u nimal i c'ux chuwach i c'ax. ¹³Chi ya u nimal i c'ux chiwach; chi cuyu i mac chiwach; chi 'ana pacha i xu 'an i Cristo chiwe yix, xu cuy i mac; xak queje ile chi 'ana yix. ¹⁴Xui-ri, are i mas 'o u chac qui 'ano, are i c'axnabal iwib chiwach, man we 'o c'axnabal i c'ux chiwach, quix tijin 'uri chu 'anic ronojel tak ile chi xin bij chiwe. ¹⁵Chi ya che i Dios quix u to man 'utz n-ta ch'o'oj ca pe chixol. Queje chi 'ana ile man i Dios ix u chom chu 'onquil ile; u 'anom xa jun chiwe pacha jun ch'aculaj. Xak chi tioxij che, ronojel wach u 'anom chiwe.

¹⁶Chi ya che i u tzij i Cristo ca q'uiji pi c'ux. Chi nawsaj iwib chiwach, xak chi ya u cowil i c'ux chiwach, xui-ri, chi 'ana ru' i nojbal chi ca pe ru' i Dios. Chi bixaj i tioxbal che i Dios, n-ta co'ono we are i bix tz'ibtal chupam u wuj i Dios ujer, o we are juban bix chi cojbal u 'ij i Dios; xui-ri, chi tioxij che, ronojel i c'ux. ¹⁷Yix iwuc'am u bi i Kajwal Jesucristo, rumal-i, ronojel i qui bij, ronojel i qui 'ano, chi 'ana 'ut pacha i c'raj ire. Chi tioxij che i ka Kajaw Dios; ile quix tiqui che rumal i Jesucristo.

**I pixbanic chique i je c'ulanic,
chique i nimak i ch'utik, chique
i je mocom, i je patron**

¹⁸Yix chi ix ixokib, we 'o iwachijil, chi ya iwib piqui'ab; mas ca majaw ile man iwuc'am u bi i Kajwal. ¹⁹Xak yix ix achiab, c'ax che i na iwixokil; mi 'an to' quix yajan chique. ²⁰Xak yix ix ac'alab, chi cojo i chuch i kajaw ronojel wach cacaj ique chiwe, man queje ile chom cril i Kajwal. ²¹Xak yix chi ix kajawxel, mi 'an to' qui petsaj coywal iwac'al, mokxa ca ba'crij qui c'ux iwumal. ²²Xak yix ix ajchaquib, che i cojo i patron waral chuwach i jyub ta'aj ronojel wach i cacaj. Mi 'ano chi xui 'utz quix chacunic are quix qui takej mok quiqui ch'ob na chi ix 'utz laj tak ajchaquib (qui bij yix). Chi 'ana i chac ronojel i

c'ux, man i Dios quix rilo. ²³Ni'pa i qui 'ano, chi 'ana ronojel i c'ux. Chi 'ana che pacha u chac i Kajwal; n-are ta pacha re jun winak qui 'an che. ²⁴Queje ile chi 'ana man iweta'am chi i Kajwal cu ya ni sipun chiwe chi u sujum chique i je re ire. Man are i Kajwal Jesucristo are i mer i patron yix; are u chac ire quix tijin chu 'anic. ²⁵Xui-ri, ni'pa i quiqui 'an i n-suc'ul taj, quiqui toj na ni'pa i n-'us taj quiqui 'ano. Quiqui toj na, man i Dios xak jun quilic co'on chique i winak conojel.

4 ¹Xak yix chi ix patron, chi 'ana i 'utz i suc'ulic chique i mocom. Cha c'un chi c'ux, xak yix 'o i Patron chila chicaj.

Chi ya iwib chu tz'onoxic che i Dios, xak chom chix 'olok

²Lic chi ya iwib chu tz'onoxic che i Dios. Are quix tijin chu 'anic, chi na u be pi c'ux wach i qui tz'onoj, xak chi c'amwaj chi tioxij che. ³Xak chi tz'onoj che i Dios pakawi yoj, chi lic cu ya na chake caka bij u tzij chique i winak wach u patan i Cristo, chi c'a te u 'alijinsam chake wach usuc'. Xa rumal u paxsaxic i tzij-i in tz'apil pa cárcel. ⁴Chi tz'onoj che i Dios pinwi, man are quin bij i tzij-i, lic sakil quelic pacha i ca majawic.

⁵Chom chix 'ol chiquiwach i ne te re i Cristo. Mi 'an ile to' ix 'olic, chi bij chique wach u patan i Cristo. ⁶Are quix lapanic, xui i chom laj tak tzij chi bij, chi 'utz ca tawic. 'O u chac quiwetamaj wach i ca majawic chi qui bij, we 'o tzij ca tz'onox chiwe.

I q'uisbal tzij re u wuj chique

⁷I kachalal ma Tíquico chi lic cakaj, ya cupon iwu'; cu bij na chiwe ronojel wach i 'antal chwe yin waral. Ire 'utz laj ajchac re i Kajwal; lic ca chacun junam wu' yin. ⁸Rumal-i, quin tak bi iwu', man que u bij chiwe wach ka 'anom yoj waral, xak que u ya u cowil i c'ux. ⁹Xak ca 'e i

ma Onésimo ru', chi iwach aj tinimit yix. Ire jun kachalal, lic c'ax caka na'o, lic u yom u wach ru' i Kajwal. Ique quiqui bij na chiwe wach coj tijin yoj chi rilic waral.

¹⁰I kachalal ma Aristarco chi wachi'il waral pa cárcel, xak cu ya pan rutzil i wach. Xak i a-Márkos chi rachalal i ma Bernabe cu ya pan rutzil i wach. Ya in bim chic chiwe wach qui 'ano we cupon ire iwu'; 'utz u c'ulaxic chi 'ana. ¹¹Xak i ma Jústo (chi xak ma Jesus u bi) xak cu ya pan rutzil i wach. Waral, ni'pa i kachalal aj Israel, xui ique que chacun wu' chu paxsaxic wach usuc' i 'atbal tzij re i Dios; ique lic qui yom u cowil in c'ux. ¹²Xak i ma Epáfras, chi iwach aj tinimit yix, xak cu ya pan rutzil i wach; ire lic ajchac chirij i Cristo. Nic are yin cu tz'onoj che i Dios piwi yix ronojel u c'ux. Craj ire chi lic jiquil i c'ux ix 'olic, xak lic i yom i c'ux chu 'onquil ronojel wach craj i Dios. Queje ile cu tz'onoj che i Dios piwi. ¹³Xin bij ile chiwe man wilom yin chi i ma Epáfras lic cu ya rib chu tz'onoxic piwi. Xak n-xui ta piwi yix, xak piquiwi i aj Laodicéa, xak i aj Hierápolis. ¹⁴Xak i ma Lúcas chi ajcun chi lic c'ax caka na'o, xak ire cu ya pan rutzil i wach, xak queje i ma Démas.

¹⁵Chi ya pan rutzil qui wach i kachalal chila pa Laodicéa. Chi ya rutzil u wach i ati Nínfas, xak conojel i je re i Dios chi quiqui mol quib pa rachoch ire. ¹⁶We xutzin u rajlaxic u wach i wuj-i chiwach, te'uri chi taka bi cu' i jutzobaj je re i Dios chila pa Laodicéa. Xak i wuj chi in tz'ibam bi chique ique, chi c'ama li yix, y chiwajlaj u wach chixol yix. ¹⁷Chi bij iri che i ma Arquipo: "Cha q'uisa u 'anic ronojel i chac u yom i Kajwal pa'ab." Queje ile cwaj qui bij che.

¹⁸Wo'or, in a-Páblo, yin mísmo quin tz'ibaj i q'uisbal tzij-i, yabal rutzil i wach. Mi sach pi c'ux chi in 'o pa cárcel. Chu ya ni 'utz i Dios piwi. Amen (queje ile cwaj).